

VIJESTI



Dodik skreće pažnju optužbama

Narodni demokratski pokret (NDP) u saopćenju ukazuje da očajnički pokušaj Milorada Dodika da diskredituje članice Saveza za promjene, zbog tobožnje štete po interese RS-a, sporazumom za formiranje vlasti na nivou BiH, ustvari predstavlja pokušaj skretanja pažnje sa najveće blamaže otkako je RS-a i u njoj demokratske izborne tradicije. - Eksplicitna i javna priča iz usta Željke Cvijanović o kupovini poslanika, kao da je riječ o pijačnoj robi, pokazuje, s druge strane, očiglednu namjeru pojedinaca iz najužeg vrha SNSD-a da se distanciraju od ovakve pijačne politike sljedbenika Dodika, stoji u saopćenju NDP-a, prenosi Fena. Stoga još jednom pozivaju nadležne, a za to sposobljene institucije, da provjere autentičnost snimka, mada NDP ne sumnja u to.

Migracije i razvoj

U Parlamentarnoj skupštini BiH jučer je počela dvodnevna naučnoistraživačka radionica Migracije u funkciji razvoja. Radionica se održava u okviru zajedničkog projekta Ministarstva za ljudska prava i izbjeglice BiH, Ambasade Švicarske u BiH i Razvojnog programa Ujedinjenih nacija (UNDP), pod nazivom Migracije i razvoj: Uvrštavanje koncepta migracija i razvoja u relevantne politike, planove i aktivnosti u BiH, javlja Fena. Zamjenica rezidentnog predstavnika UNDP-a u BiH Zahira Virani naglasila je da su doznake iz inostranstva tri puta veće od onoga što daje međunarodna zajednica. - Gotovo milion i po bh. građana živi širom svijeta, što je 40 posto ukupnog stanovništva. Oni šalju kući tri i po milijarde dolara godišnje, a to je gotovo 10 posto BDP-a BiH. To je drugi najviši postotak u Evropi, kazala je Virani.



Presuda Popoviću i ostalim 30. januara

Apelaciono vijeće Haškog tribunala će 30. januara izreći presudu Vujadinu Popoviću i još četvorici optuženih, koji su u prvostepenom postupku osuđeni za genocid i druge zločine u Srebrenici počinjene u julu 1995, javlja Fena. Presuda će biti izrečena nakon što je Apelaciono vijeće razmotrilo žalbe Vujadina Popovića, Ljubiše Beare, Drage Nikolića, Radivoja Miletića, Vinka Pandurevića i haškog tužilaštva. Presudom, koja je izrečena u junu 2010, na doživotnu kaznu zatvora zbog genocida u Srebrenici osuđeni su Vujadin Popović, nekadašnji načelnik za bezbjednost u Drinskom korpusu Vojske RS-a, i Ljubiša Beara, bivši načelnik za bezbjednost Glavnog štaba VRS-a. Drago Nikolić osuđen je na 35 godina zatvora, Radivoje Miletić na 19, a Vinko Pandurević na 13 godina zatvora.

Kosteale: Sve raskoši prirode

MEĐU MLINOVE NA UNI ZALAZE I ARAPI

Slapova je bilo na sve strane, a elektrana je to izmijenila. Eto, čujemo da će graditi još jednu, kako je projektom još u onaj vakat bila uplanirana. Prvi nacrti su čak austrougarski, priča nam Muminović

Nedaleko od Bihaća, nizvodno, nalazi se mjesto Kosteale, za koje se priča da je od pamtivijeka bilo najljepši dio uz rijeku Unu. Zadnjih 50 godina taj ambijent se izmijenio, ali je zanimljiva priča kako je naseljeno mjesto uopšte i nastalo.

Poviše, na Srbijanskom platou, nalazilo se selo Spahići, gdje je većina ljudi služila u domobranima i ustašama. Kada su partizani zauzeli Bihać, kod njih su se zadnje borbe i dalje vodile. Zbog veze sa ustašama, zapaljene su im kuće. Kada se rat smirio, stanovništvo nije imalo gdje nego se uselilo u svoje mlinove koje su imali u Kostelama na Uni.

Selo je nastalo iz nužde.

Pećine od sedre

- Bilo je ovdje oko 50 mlinova. Kada nigdje zbog vodostaja mlinovi nisu mogli raditi, ovdje su radili, jer su naši dobri majstori napravili razne mlinove i za nabujalu i za oskudnu vodu. Svugdje su ovuda bile pećine od sedre, ljudi su tu stavljali svoje šporete, spavali u mlinovima, dograđivali ih sebi u kuće i tako je nastalo cijelo selo, priča nam mještalin Edhem Muminović.


Takvog sela nije bilo nigdje na svijetu, osim ako ga nije Hollywood za Hobite pravio.

I danas su Kosteale predivne, ali je nestalo te starine.

Jedine sačuvane slike nalaze se u hidroelektrani preko puta njih, koja je napravljena u vrijeme Tita. Kuće su nicala, ali su se i srozavale na ovim sedrama i goleme



Kuće na stijenama



Jedan od mostova preko Une



Muminović: Nekad se spavalo u mlinovima

Obilježen dan Četvrtog korpusa Armije RBiH

IMAMO PRAVA SAMO NA PAPIRU

Borci koji su odbranili grad Mostar i domovinu zaslužuju bolji status, a nadamo se da će nova vlast okrenuti novi list, kaže Muharemović

Polaganjem cvijeća i sjećanjem na stradale suborce, jučer je na mostarskim Šehitlucima obilježena 22. godišnjica formiranja Četvrtog korpusa Armije Republike Bosne i Hercegovine. Skupu kojemu je prisustvovao veliki broj uglednika iz javnog života grada i regije obratio se ratni komandant Suad Muharemović, koji je govorio o samom korpusu kao i o odbrambeno-slobodilačkom ratu u našoj zemlji, sa akcentom na odbranu grada Mostara.

- Kao korpus prošli smo težak

put u kojemu smo se u jednom trenutku morali boriti protiv dva agresora, kako bismo sačuvali slobodni teritorij i naš narod, poručio je Muharemović, koji se potom dotakao i prava boraca.

- Tokom rata nismo mislili o pravima, već o našim domovima i našoj djeci koju smo branili svih tih godina. Nažalost, već neko vrijeme pojedinci su aktivni na polju umanjivanja naših prava. Mi imamo svojih prava na nivou države, entiteta i kantona, u zakonima i papirima koliko god hoćete. Među-



Pomen stradalima na Šehitlucima

tim, ta prava se ne provode i ne dolaze do običnog vojnika, kako bi se pomoglo njemu i njegovoj porodici, ocijenio je Muharemović, dodajući kako se iskreno nada "da će neka nova vlast okrenuti novi list kada je naš problem u pitanju".

- Odnosno, da će borcima koji su odbranili ovu državu posvetiti više pažnje, dodao je Muharemović.

Ove godine, za razliku od prethodnih, Četvrti korpus Armije RBiH nije organizovao svečanom akademiju povodom dana svog osnutka.

- Borci tu svečanost nemaju kome organizovati. Ljudi kojima bismo željeli organizovati akademiju ne bi došli, dok bi pojedinci došli tek iz pukog ličnog interesa ili zbog obaveze, zaključio je Muharemović. **A. DEMIĆ**